

مبادئ الحياة الروحية

دوافع العمل

إعداد
بيت محبة الله

سلسلة مبادئ في الحياة الروحية
(١٢/١٠) .

كيف أعمل مع الله (٣) دوافع العمل

... إعداد ..
بيت محبة الله ...

اسم الكتاب : سلسلة مبادئ في الحياة الروحية.

. دوافع العمل.

إعداد: خدام بيت محبة الله للطلبة المغتربين.

رقم الإيداع: ٢٠١٦/٧٤٥٥

الترقيم الدولي: I.S.B.N ٩٧٨-٩٧٧٩-٠٣-٨٥٩-٩

* لنا رجاء فى المسيح ان تصل هذه
السلسلة إلى يد كل شاب مسيحى بأقل
تكلفة.

*يمكنك ان تشاركنا هذا الرجاء بإهداءها
لأصدقائك واحباءك.

ملاحظة: للاستفادة الكاملة من هذه السلسلة الرجاء قراءتها بترتيب الأجزاء

كاملة فعدم الترتيب يمكن أن يسبب تشويش وعدم الاستمرار قد يسبب
إحباط.



قداسة البابا تواضروس الثاني

بابا الإسكندرية وبطريك الكرازة المرقسية (١١٨)

تقديم

العمل مع الله ضرورة وليس اختيار، هكذا يقول بولس الرسول في (١ كور ٩: ١٦). فكل من أدراك معنى الغفران ومعنى الأبدية السعيدة ومعنى أبوة الله لا يستطيع أن يسكت ابداً. فمشكلتنا إن إدراكنا ضعيف أو معدوم، والدليل على ذلك هو عدم وجود ثمر حقيقي، فالوصية الأخيرة التي قالها لنا الرب يسوع "اكثروا بالإنجيل لخليقة كلها" (مر ١٦: ١٥). فأصبحت كلمة الكرازة مجرد كلمة نقولها وشعارات نرددناها ونتلوها في صلواتنا بدون فهم أو تركيز. فكلنا نقول بأعلى صوت في القداس الإلهي "بموتك يارب نبشر". لكن ما هو حقيقة ذلك على أرض الواقع!!

هذه السلسلة تتدرج معك ببساطة وهدوء في الحياة الروحية لتصل لإدراك حقيقي لمعنى العمل مع الله. إن أردت استفادة حقيقة تحتاج أن تبدأها من البداية وتطبق خطواتها العملية حتى يكون الثمر طبيعي وليس مفتعل والادراك حقيقي وليس وهمي.

الرب يسوع يلهب قلوبنا وقلوب كل شعبه بخلاص النفوس ويعطينا إدراك حقيقي. بشفاعة أمنا العذراء وصلوات أيينا المكرم قداسة البابا تواضروس الثاني، ولإلهنا المجد في كنيسته إلى الأبد آمين.

وأنا في طريقي لأبى لنكمل كلام المرة اللي فاتت تردد في ذهني
كلامه وكأن صوت رعد يرن في الصحراء ويتردد في أعماقي.
(اللى يدرك ما يسكتش واللى يسكت ما أدركش!!)

فقلت لنفسى "أه من ساعة أبى ما قال الكلمتين دول وأنا مش
عارف أنا، الصراحة كلمة الكرازة كلمة جديدة علّى فكل اللي أعرفه
إن الكرازة مهرجان!! مهرجان وبس!!.. أما إني أكرز وأكون زي الرسل
وأغيّر الشعوب؟! فدا موضوع جديد وكبير!! أنا آخري أروح المهرجان!!
هي دي الكرازة بالنسبة لي وبالنسبة لكل الشباب في سنّ!! محتاج أفهم
أكثر من أبى!!

سلام يا أبى

قال: سلام ونعمة يا ابني. إيه أخبارك يا ابني طمني عليك.
قلت: نشكر ربنا. بس الصراحة الكلام بتاع المرة اللي فاتت كان
غريب وجديد. بالرغم إني مقتنع بيه. لكن لسه عاوز توضيح أكثر عن
الموضوع.

قال: النهاردة بنعمة ربنا هانتكلم عن دوافع العمل مع الله، وعلشان
ننجح في أي عمل ضروري يكون فيه دافع قوى للنجاح، وكل ما كان
الدافع قوى، كل ما كان فيه غيرة ونشاط للعمل أكثر. ها أقول قصة
توضح لك أهمية الدافع في النجاح. مرة شاب راح لحكيم يوناني وقاله
شاب: عاوز أتعلم مبادئ النجاح. إزاي أنجح في حياتي؟!

الحكيم: أول مبدأ للنجاح يا ابني هو الدافع. فكل ما كان فيه جواك دافع حقيقي، ها تجتهد وتتعب علشان تنجح، لكن لو ما كنش فيه جواك دافع للعمل اللى بتعمله، هتلاقى نفسك كسلان وتعبان دايمًا.

شاب: الكلام رائع يا حكيم، لكن ممكن توضح لي بحاجة عملية، أو بحاجة ملموسة أكثر.

الحكيم: ها أوضح لك يا ابني.
وبدأ الحكيم يصب ماء في طبق وقال
الحكيم: إيه دا؟

شاب: دا طبق ممتلئ بالماء.
الحكيم: استأذنك. هات رأسك. نخطها في الماء؟
شاب. اتفضل.

ومسك الحكيم رأس الشاب وحطها في الميه وداس عليها بقوة.
وبعد فترة حس الشاب بالاختناق.

فقال الشاب وهو يصرخ: "خلاص أنا تعب. أنا اتخنتقت.
خلاص يا حكيم. خلاص فهمت. كفايا كفايا كدا!!
والحكيم مش عاوز يسييه ابدأ. لحد ما الشاب ما حاول بكل
إمكانياته وأتخلص من إيد الحكيم.
شاب: إيه دا يا حكيم!! أن هاتعلمنى ولا هاتموتنى!!

الحكيم: دا أول مبدأ للنجاح. إن يكون عندك دافع. فلأنك مقدر قيمة الحياة وعارف إنك لو فضلت سايب رأسك في الماء هاتموت،

فإن كنا لا نخلص
نفوسنا ولا نفوس
الآخرين، فأى شر لا
يحل بنا؟!
(القديس يوحنا ذهبي
الفم)
الحب الأخوي ص

علشان كدا استخدمت كل قوتك علشان
تخلص من إيدي وتطلع رأسك بره الماء.
زى كدا، علشان تنجح في أي عمل،
ضرورى يكون عندك دافع قوى إنك
تعمله، هو دا اللى يخليك تتعب وتجتهد
فيه. فهمت يا ابني.

فعلشان ننجح في العمل مع الله، ضرورى يكون عندنا دافع قوى
للعمل، وأول دافع للعمل هو
إدراك عمل الله معنا.

وأول ادراك لعمل الله معنا هو

إدراك غفراننا الكامل

فإحنا هاننادي بالخلاص والغفران، فإزاي ننادي بحاجة وإحنا مش
مقتنعين بيها أو مش مدركين ليها!! فلو حد نادى وقال:
- تعالوا للمسيح. إقبلوا المسيح. أمنوا بالمسيح!!

فالناس. هاتقولوا:

- هايعمل لينا إيه المسيح. - إيه اللى ها نستفيده من المسيح!! -
يعنى إيه الإيمان بالمسيح!!

- . هايغفر ليكم كل خطاياكم ويطهركم من كل ذنوبكم. أصل المسيح مات وفدانا.

- هل غفر لك أنت كل خطاياك!! يعنى أنت لما أمنت غفر لك كل خطاياك!!

خفر لى كل خطاياى!! لا!! لسه فيها خطايا ماتغفرتش. لكن هو بيغفر. هو بيغفر!!

-: طيب لما يغفر لك الأول يبقى يغفر لنا!! لما تبقى مؤمن باللى بتقوله أبقي تعالى كلمنا!! إبدأ بنفسك يا أخى!!
قال: فلو ما كنش عندنا ثقة كاملة في اللى بنادي بيه، هايكون كل اللى بنقوله مجرد كلام ماهوش أي معنى ولا فاعلية.

فإدراك غفراننا الكامل والفوري والمجاني،

هو أول دافع للعمل، فلو ما وثقناش في الغفران الكامل، مش هانعرف نكرز أبداً.

فموت المسيح وقيامته صرنا أحرار من سلطان إبليس، وكمان بقى
لينا إحنا السلطان على إبليس، فالمسيح قال في (لو ١٠ : ١٩) "هَا أَنَا
عَلَيْكُمْ سُلْطَانًا لِّ تَلْبُسُوا الْحَيَّاتِ وَالْعَقَابِ كُلَّ قُوَّةِ الْعَدُوِّ وَلَا يَضُرُّكُمْ
شَيْءٌ .

فلو ما وثقناش إن المسيح غفر لنا كل خطايانا، وإن إبليس ماهوش
سلطان علينا، فكلامنا وتعليمنا هايبقى ماهوش أي معنى، وكل كرازتنا
هاتكون باطلة، وكلامنا كله هايكون ماهوش أي تأثير!! ولو إتكلمنا

هانكون زى اللى بيدعو الناس لمجموعة أو حزب مش لحياة سماوية وأبدية مع المسيح.

قلت: يعنى كدا لازم يكون الواحد بلا خطية علشان يكرز ويتكلم عن المسيح؟!

قال: زى ما شرحنا قبل كدا كتير، فيه فرق بين جندي يبحارب فينجرح فيرجع فالقائد يعالجه ويضمده جراحه، وفرق بين جندي استسلم وبقي أسير ورافض إنه يرجع. فإبليس مالهوش تسلط علينا، ولكن كل اللى يقدر يعمله إنه يحاربنا، ومش معنى إنه يبحاربنا يبقى كدا بقينا عبيد، مش معنى إننا بننجرح في الحرب يبقى كدا ضعنا وانهزمنا!!

قلت: الصراحة يا أبى النقطة دى سبب تعب لشباب كتير حاسين إنهم طالما بيسقطوا في الخطية يبقى كدا مرفوضين والله مش طايقهم!!
قال: ودى رسالة المسيح اللى عاوزنا نوصلها، رسالة الغفران والخلاص، والمسيح جه وحررنا وقال "إن حرركم الابن بالحقيقة تكونون أحرارا" (يو ٨ : ٣٢)

قال: فمن غير المسيح، هاتفضل البشرية في عبودية لإبليس. من غير المسيح، هاتفضل كل البشرية أسرى للخطية وللشر. لكن الإيمان بالمسيح بيدى حرية وغفران وسلطان على إبليس. ودى الرسالة اللى المسيح عاوزنا نوصلها. فالمسيح عاوز يقول لنا

"أنا جيت وغفرت كل خطايا العالم. كل اللى هايؤمن

بى هايترحر من سلطان إبليس. كل اللى هايبتعننى

هاطهره بدمى وهاغسله من كل ذنوبه، ودى رسالتى
الى عاوزكم توصلوها، أنتم أولادى، انتم شهودى،
قولوا لأخوتكم اللى لسه مش مصدقين غفرانى، إنى
بأحبهم، قولولهم إنى غفرت ليهم خطاياهم، محتاجكم
توصلوا رسالتى لكل العالم، فلو فعلا قبلتوا غفرانى
ضرورى تركزوا بيه، ليه تستمتعوا بالغفران وتسيبوا
أخوتكم عبيد لابليس، ليه تعرفوا نعمتى وتسيبوا
إخوتكم محرومين منها، حسوا بقلبى اللى بيدمى على
ولادى المساكين، اللى مش عارفين غفرانى ولا محبتى.
حسوا بأبوتى فأنا مشتاق إن جميع العالم يخلص،
ويتمتع بغفرانى. اللى بيفرح قلبى انكم تركزوا بخلاصى
وغفرانى لكل شعوب الأرض"

فاللى يدرك معنى الغفران مش ممكن أبدا يسكت. والغفران فى
المسيحية هو غفران مجانى، فالإنسان هو اللى بيخطئ، والله هو اللى
بيدفع الثمن، الإنسان هو اللى بيستحق العقاب، والله هو اللى بيشيل
العقوبة. ودا تفرد المسيحية.

قلت: يعنى إيه يا أبونا الإنسان بيخطئ والله هو اللى بيدفع الثمن؟!
قال: أجرة الخطية موت، فالإنسان لما بيخطئ كدا بيستحق الموت،
لكن لما بيرجع ويتوب مش ييموت، لكن بيتطهر فى دم المسيح، فالغفران
فى المسيحية مجاناً تماماً، الله هو اللى دفع ثمن خطايانا. زى ابن ييغلط

ويكسر إزاز عربية في الشارع، وأبوه هو اللي بيدفع الغرامة. فمكتوب
مَجْرِينَ مَجَانًا بِنَهْمَتِهِ بِالْفَاءِ الْيَائِي بِسُوعَ الْمَسِيحِ (رو ٣ : ٢٤)
فاللى يدرك معنى الغفران الكامل، ويدرك معنى الحرية والخلاص
المجانى، مش ممكن يسكت ابدًا، ولو سكت يبقى سكوته خيانة
للأمانة، ويبقى إدراكه مش حقيقى، فإزاي إحنا نستمتع بالغفران
ونسبب إخوتنا اللي حوالينا عبيد لابليس!! إزاي المسيح ييجى ويموت
علشان يفدى كل البشرية، وإحنا نقبله ونفرح بيه ونسبب إخوتنا
محرومين منه!! الصراحة يا ابني

اللى يدرك الغفران الحقيقى مش هيقدر يسكت ابدًا

قلت: فعلا اللي يدرك الغفران ما يقدرش يسكت ابدًا، طيب إيه
النقطة الثانية لادراك عمل المسيح معنا؟!

قال: تاني نقطة لإدراك عمل المسيح معنا هي

إدراك أبديتنا السعيدة.

فالمسيح جه علشان يكون لينا حياة أبدية، فكل اللي يصدق إن
ليه حياة أبدية ما يطيقش يسكت، لكن لو إحنا مش واثقين إن لينا
حياة أبدية هانكرز بإيه!! هانقول للناس إيه!! فلو شخص قال

—تعالوا يا ناس أمنوا بالمسيح، تعالوا يا ناس اعرفوا المسيح!!

فالناس هاتقولوله: يعنى إيه نأمن بالمسيح!!—قلنا إزاي نأمن—يعنى

إيه الايمان بالمسيح!!

- يعنى تصلى السبع صلوات، وتصوم ٢٠٠ يوم في السنة، وتحفظ كل الوصايا.

-: طيب وبعد دا كله هانروح فين!! النهاية إيه!!-هانروح فين بعد ما نعمل دا كله!!

- ماتسألش!! حسب الظروف!! في الغالب كلنا هانروح جهنم!!
- وعلى إيه!! نتعب ونصوم ونصلى!! وفي الآخر جهنم! أو حسب الظروف!! طيب ما نأكل ونشرب ونعمل اللي إحنا عاوزينه!!
وبعدين زى ما تيجى تيجى!!

فلو إحنا ما عندناش ثقة الأبدية السعيدة، هاتكون كرازتنا باطلة وكلامنا بلا معنى!! ما هو ليه هانتعب وليه هانجاهد، وإحنا عارفين إن النهاية محتومة أو مجهولة!! لكن اللي يثق إن ليه أبدية سعيدة، مش هايقدر يسكت ابدأً، حتى لو كان في آخر لحظات حياته. كان فيه كارز إنجليزى عنده ٧٥ سنة عاش أغلب حياته بيكرز في الهند، وفي يوم وهو بيوعظ في اجتماع في إنجلترا عن أهمية الكرازة بالإنجيل قال

”الكرازة هي إننا نقدم المسيح للشعوب اللي لسه عايشة في العبادات الوثنية، ودى هي الوصية الأخيرة اللي قالها المسيح للتلاميذ. المسيح بذل دمه علشان يفدى العالم كله، ونفسه إن العالم كله يقبل الخلاص، فمش عاوزين دم المسيح يروح هدر، عاوزين نحس بقلب الرب يسوع، فرح المسيح إن الناس تخلص وتعرف غفرانه، فرح المسيح إن جميع الشعوب تعرف أبوته ومحبته، وإحنا مسئولين عن توصيل

رسالة الحب والغفران لكل الشعوب، لأن دى هي وصيته الأخيرة لينا، فكل اللي عرف محبة المسيح ووثق فى أبوة الله وعنده رجاء الأبدية السعيدة مش ممكن يسكت ابدًا. فيه شعوب لسه بتعبد الحجارة، وفيه اللي بيعبد بتعبد النار، فيه شعوب كتير محتاجة تعرف الله الحقيقي وتسمع عن الخلاص. إحنا مسئولين..” وهو بيتكلم تعب واغمى عليه فالناس أخذوه للمستشفى والدكتور قاله: معلىش يا دكتور "دف"

أنت مرهق ومحتاج تستريح شوية

فرفض وقاله: مش هأقدر استريح غير بعد ما أكمل العظة وفعلا رجع الاجتماع وكمل وقال:

”نفسى أقولكم، ان فيه شعوب كتير محتاجة تعرف نور المسيح وتعرف محبته، فيه ناس كتير مشتاقة إنها تعرف محبة الله الحقيقى، وإن ماكانش حد من الشباب هايروح يكمل الكرازة، أنا عندى استعداد بالرغم من شيخوختى، أرجع وأقضى باقى عمرى على ضفاف السند والكنج، واکرز بالخلاص والأبدية للناس اللي مات المسيح علشانهم، فانتوا ماتعرفوش أد إيه كل نفس ليها قيمة في عين الله، كل نفس تساوى دم المسيح، ودى مسئوليتنا إننا نخبر ونكرز بكدا لحد ما نموت“ قال: فإحنا مشكلتنا يا ابنى إننا مش مقدرين قيمة الحياة الأبدية. قلت: ليه مش مقدرين قيمة الحياة الأبدية!!

قال: الصراحة مش مقدرين قيمة الحياة الأبدية لأننا مش واثقين فيها. يعنى لو شاب صغير وليه علاقة قوية مع المسيح ومات فجأة، نلاقى الناس تحزن وتكتئب وتقول "مات مات- يا حرام كان لسه شاب صغير-مات بدرى- كان لسه شباب!!

وننسى إنه كان ليه علاقة مع المسيح، وإنه رايح الأبدية السعيدة، وإنه فاز في معركته مع إبليس واخد إكليل المجد والإنصار. لكن لو شخص عنده ١٠٠ سنة وكان بعيد عن المسيح ومات، نقول عنه

"استريح- دا ليه سنين في المرض-ربنا رايحه-كدا استريح من التعب-كدا أريح له"

استريح ازاي!! إيه الراحة اللي استريحها!!
فالمشكلة مش اللي مات شاب صغير ولا راجل كبير،
لكن المهم هو كان ليه علاقة مع المسيح ولا لا، هو كان
عايش الملكوت من هنا ولا لا، لو فكرنا كدا مش
هانحزن ابدًا على أي حد بيמות ليه علاقة مع
المسيح، لكن هانفرح انه انتصر وفاز بالأبدية.

زى ما يكون واحد مسافر في بحر، وسط أمواج عالية وعواصف خطيرة، فلما يوصل بسلام للميناء، هانفرح له ومش ممكن نحزن عليه ابدًا!! واحد من الخدام قال

”لما اتوفى والدى كان عندى شعورين متضادين، كنت زعلان لفراقه، لانى كنت بأحبه جدا، فهو اللى عرفنى محبة المسيح، وعرفنى ازاى اثق في الغفران، ولكن كان عندى مشاعر تانية. كانت عندى مشاعر فرح إنه انتصر ووصل للميناء، وبقي في أحضان المسيح. فوالدى كان بيبحب المسيح جدا وماكانش بيخاف من الموت ابدًا. فماكنتش عارف أحزن ولا افرح، ولما بدأت أردد الترنيمة اللى بتقول ” يعظم انتصارنا بالذى أحبانا) ٢.. (يسوع الفادى الأمين قد صلب

لاجلنا) ٢

لقيت مشاعر الحزن اتحولت لفرح، وحسيت إنى فرحان لوالدى بانتصاره على الموت وحسيت كأنى بأوصل حد بحبه لمكان عرسه، أو للمكان اللى هايتكرم فيه”

قال: فمشكلتنا الكبيرة إننا ما عندناش

النظرة الأبديّة!!

قلت: يعنى إيه النظرة الأبديّة يا أبونا؟!

قال: **النظرة الأبديّة**، إننا نبقى عارفين،

إن حياتنا مش مجرد السنين اللى هانعيشها على الأرض وبس، لكن حياتنا على الأرض، هي جزء صغير، وباقي حياتنا اللى مش هاينتهى ابدًا، هانكملة في السما. ولما نجى نقارن بينهم، نلاقى إن حياتنا مهما

إن كان الذي يخلص
أحدا من الموت
الجسداني، مع انه إن لم
يجده الموت اليوم يموت
غدا، يستحقها من
يخلص نفسا من الموت
الأبدى، ويسبب لها حياة
مجد ابدى لا تخسره
أبدًا. (الأب
إغريغوريوس)
الحب الرعوي ص
٢٣٤

طالت أو قصرت، فهي بالنسبة للأبدية مجرد بخار، ومكاننا الدائم هو في السما. يقول بولس لأوثولوس "لَنَا هَذَا مِلِينَةً بِأَقِيَّةً، لَكِنَّا نَطْلُبُ الْعَمِلَةَ" (عب ١٣ : ١٤)

قال: فحياتنا هنا مؤقتة ومقارنة بالأبدية تعتبر لا شيء، ودا رجاء لكل تعبان ومريض، وتعزية لكل فقير ومحتاج، ودا هو اللى بيدينا غيرة على خلاص النفوس، فلما يكون عندنا النظرة الأبدية، مش هانبص ونقول دا مريض ولا سليم، دا غنى ولا فقير، لكن هانقول دا ليه علاقة مع المسيح ولا لا، دا عنده رجاء في الحياة الأبدية ولا لا، فلو عندنا رجاء حقيقى في الأبدية السعيدة، مش هانقدر نسكت ابدا. واحد من الملحدِين قال

"لو كنت مؤمن زى ملايين المسيحيين، اللى بيقولوا إن الايمان بالله والعمل بوصاياه، بيقررُوا المصير الأبدى، كان هايبقى الايمان كل شيء في حياتى، وكان هايبقى أول شيء يخطر على بالى أول ما أضحى، وآخر حاجة أفكر فيها قبل ما أنام. وهايكون بالنسبة لى إن شخص واحد يآمن بالمسيح، يساوى تعب الدنيا كلها. فالموضوع خطير، فهو مش ليوم ولا لاتنين، فكلمة أبدية كلمة خطيرة!! فأنا مش عارف ليه المسيحيين ما عندهم مش الحماس والغيرة على مصير الناس اللى حوالِيهم؟!"

الصراحة لو إيمانهم حقيقى ، يبقى سكوتهم دا جريمة

في حق البشرية!!

قال: فإزاي حد يبقى شايف إخوانه في البشرية ماشيين ناحية الهلاك الأبدي، وهو ساكت!! إزاي حد عرف يعنى إيه الأبدية والملكوت، ويسيب الناس اللي حواليه يهلكوا!! الصراحة اللي يعمل كدا، دا فعلا بيرتكب جريمة في حق البشرية، وزى ما قال يعقوب الرسول قُتْنِي يَعْرفُ أَنَّ يَ عَمَلِ حَسَنًا وَلَا يَلْعَبُ ، فَذَلِك خَطِيئَةٌ لَهُ (يع ٤ : ١٧).

قلت: فعلا يا أبونا حاجة تحزن. يبقى الناس حوالينا محتاجة تسمع وإحنا ساكتين، دى فعلا تبقى حاجة صعبة. لكن إيه النقطة الثالثة في إدراك عمل الله معنا؟!

قال: تالت نقطة في إدراك عمل المسيح معنا. هي

إدراك أبوة الله.

فمعنى إننا بقينا مسيحيين، دا معناه إننا نقدر نقول إن الله أبونا، فالمسيحية هي الديانة الوحيدة، اللي فيها يقدر الواحد يقول إن الله أبوه، ويصلى ويقول أبانا، المسيحية هي الديانة الوحيدة، اللي فيها الله صديق للإنسان وحبیب ألصق من الأخ، بيقول بولس الرسول "إِذَا لَسْتُ بِعَدَمٍ دَأْبَلِ ابْنًا، وَإِنْ كُنْتُ ابْنًا فَوَارِثٌ لِلَّهِ بِالْمَسِيحِ" (غل ٤ : ٧). فالمسيح جه وخلصنا أحرار وأبناء لله، ومن غير المسيح استحالة الواحد يقدر يقول إن الله أبوه، فأبوة الله مرتبطة بإيماننا بالمسيح، واللى

بيقتر معنى أبوة الله، ما يقدرش يسكت ويسيب إخواته عايشين في العبودية والرعب من الله!! كان فيه واحد من الكارزين بيكرز في بلد كلها وثنيين وكان يقول لهم "الله هو اللى خلق السما والأرض، الله هو اللى خلقنا وهو بيعبنا، وهو قريب مننا جدا، وكل اللى يقبل حبه هايعيش في سلام وفرح، فكل واحد في البشرية، الله بيعبه باسمه.

- "معقولة الاله بيعبنا وقريب مننا!! لا لا. الاله بعيد جدا عن البشر!! "إحنا بنخاف من الاله ونتعبد ليه، لكن يعنى إيه الاله يحبنا!! كلام جديد وغريب!!

- "الله قريب مننا جدا وكمان هو أبونا ونقدر نصلى له ونقوله "أبانا " فإحنا أولاده.

- "إزاي تقول كدا- إحنا عبيد الاله-الله بعيد عننا جدا -الله عظيم جدا- إزاي تقول إحنا أولاد الله!!!

- "الله أخذ جسد وظهر، وكان اسمه المسيح، لأنه مسحنا من ذنوبنا وخلصنا من خطايانا. وكان اسمه كلمة الله، لأنه كلمنا عن الله وعن حبه، وكل اللى يآمن بالمسيح يبقى ابن مش عبد، وعلاقته بالله هاتبقى علاقة الحب مش علاقة العبودية. فالإيمان بالمسيح بيخلينا أولاد الله ونقدر نقوله أبانا، ونحبه مش نخاف منه.

- "معقولة نحب الاله مانخفش منه!! كلام جديد علينا!! لكن مافيش مانع نسمع منك!! "دا إحنا بنعبده الاله علشان بنخاف منه!!

طيب لو مش هاتخاف منه هانعبده ليه!! "دا كل حاجة بنخاف منها
بنعبدها ونخليها إله!! إيه الاله الجديد دا!!

- "الله مش محتاج عبيد، الله مش محتاج حد يخاف منه، الله محبة
وكل اللي يعرفه يحبه، هو مش عاوز مننا حاجة، هو جه علشان يديننا
كل حاجة.

قال: ودا كان مفتاح قوى للكراسة للناس دول، إنه كان دايمًا
بيكلمهم عن الله المحب، الله اللي نقدر نقوله "بابا". ودى كانت بداية
قوية إنهم يفكروا ويعرفوا اختلاف الله في المسيحية. ففي المسيحية،
الإنسان بقى ابن بعد ما كان عبد، فإدراك إننا بقينا أبناء مش عبيد،
يخلي جوانا غيرة على إخوتنا، اللي لسه شاعرين بالعبودية والخوف من
الله، فإزاي نفرح إحنا بأبوة الله وحبه، ونسبب باقى إخوتنا في البشرية،
يعانوا ويعيشوا زى العبيد، اللي يدرك أبوة الله مايقدرش يسكت ابدأً.
ودا تفرد المسيحية، يعنى لو أي حد سأل وقال

"ليه أنت مسيحي؟! إيه السبب اللي يخليك ترضى بالمسيحية
وتقتنع بيها؟!

فالمسيحية يعنى ثلاث حاجات.

أول حاجة الله بقى أبويا.

فالمسيحية هي الديانة الوحيدة اللي الواحد فيها يقدر يقول لله "
أبانا" ومش مجرد أب دا كمان صديق وحبيب.

قلت.: طيب وإيه الحاجة الثانية؟!

قال: الحاجة الثانية لتفرد المسيحية هي

الغفران مجاني.

فالمسيحية هي الديانة الوحيدة اللى فيها الله فيها هو اللى بيدفع
تمن ذنب الإنسان. فأجرة الخطية موت، والمسيح هو اللى مات من
اجل خطايانا وإدانا الفداء المجانى. فالإنسان مايقدرش يدفع أجرة
الخطية، ولا يتحمل نتيجة ذنبه. وما فيش ذبيحة حيوانية تقدر تغفر
الخطية ابدًا، يقول مكتوب "لأنَّهُ لَا يُمْكِنُ أَنْ دَمَ الْبَهَائِمِ يُوسِّى رُفْعَ
خَطَايَا" (عب ١٠: ٤). بيقول بولس الرسول، مش ممكن دم التيوس
والعجول تغفر خطايا البشر، فالإنسان مستحيل إن يكون قيمته تساوى
تيوس وعجول.

قلت: طبعا تبقى إهانة لو الواحد قيمته تساوى تيوس أو عجول.

لكن مش في العهد القديم كانت الذبائح من الحيوانات دى؟!

قال: فعلا في العهد القديم دى كانت الذبائح، لكنها كانت مجرد

رمز، علشان نعرف إنه ضرورى يكون فيه فداء، وضرورى يكون فيه

ذبيحة، علشان كذا بولس الرسول بيقول "لأنَّ التَّائُوسَ، إِذْ لَهُ ظِلُّ

الْحَيَاتِ الْعَمِيلَةِ لَا نَفْسَ صُورَةِ الْأَشْيَاءِ لَا يَسْقُطُ أَبَدًا بِنَفْسِ الدَّبَّاحِ

كُلِّ سَنَةٍ الَّتِي يُقَدَّوْنَ عَلَيْهَا الدَّوَامِ، أَنْ يَكْمَلَ الثَّانِي يَتَقَدَّوْنَ". (عب

١٠ : ١).

علشان كذا كل ذبائح العهد القديم ما غفرتش الخطية، لكنها

كانت مجرد رمز للغفران اللى تم بدم المسيح، وكل اللى ماتوا قبل المسيح

-حتى أبونا إبراهيم وداود وكل الأنبياء، كانوا في الجحيم لحد ما جه المسيح، وموته وقيامته أصعدهم وحررهم. ففي المسيحية الإنسان قيمته غالية جدا في عين الله، الله تجسد وبذل دمه لأجلنا، والغفران مجاني تماما، ومحتاج بس الواحد يقبله بالتوبة.

قلت: الغفران مجاني ومحتاج بس الإنسان يقبله بالتوبة. طيب وإيه

الحاجة الثالثة لتفرد المسيحية؟

قال: والحاجة الثالثة لتفرد المسيحية، هي

ثقة الأبدية السعيدة.

ففي المسيحية بنثق إننا هانروح السما، وبنعيش على الرجاء دا، ودخول السما في المسيحية مش معتمد على أعمالنا، لكن على محبة الله ونعمته. فاللى يقبل محبة الله ليه، هو دا اللى هانروح السما. واللى يرفض المحبة، فدا اللى مش عاوز يعيش مع الله. فالحبة هي المقياس.

قلت: طيب كدا حفظ الوصايا مش ضرورى علشان الواحد يروح

السما؟!

قال: الوصايا طبعاً مهمة، لكن المحبة في الأول، فالدليل إن المحبة حقيقية هو حفظ الوصايا، فلما أحب حد ما أحبش أزعله ولا أبعد عنه، لكن لو كنت بأحفظ كل الوصايا وبأعمل كل الفروض من غير ما أحب الله، فكدا مش هاعرف أعيش مع الله في السما، فالسما مش مكان هاشتره بفروضى وجهادى، لكن مكان هاروحه لأنى حابب أكون هناك. ولو مش حابب الله، كدا مش هاتبقى سما!!

قلت: فعلا لو الواحد هايكون في مكان مع حد مش يبجبه إلى الأبد، يبقى مش سما ابدأ. دا يبقى هو الجحيم بجد.

قال: يبقى أنا مسيحي وبأختار المسيحية- باختصار علشان ثلاثة حاجات، لأن المسيحية هي الوحيدة اللي بتخليني ابن لله، وبتخليني اثق في غفران كامل ومجاني، وبتديني ثقة كاملة في أبدية سعيدة.

”بأشكرك يارب لانى مسيحي، بأشكرك يارب لانى ابن مش عبد، ابن حبيب ليك والحياة معاك سهلة وممتعة مش متعبة ومملة، اشكرك يارب لانك فديتنى، وقيمتى بقيت تساوى دمك، إيه النعمة دى يارب يسوع!! انا اللي بأخطئ وانت اللي بتسد الدين!! انا اللي بأكون مستحق العقاب وأنت اللي بتشيل ذنبى. وبأشكرك يارب من اجل الأبدية السعيدة اللي انت مستنينى فيها، أنا مش خايف من الموت، لأنه مش موت لكن انتقال لاحضانك ومحبتك. يارب خلينى اشعر بإخوتى في البشرية، وبكل حد محروم من أبوتك، ومن غفرانك وأبديتك، خلينى اشعر بمسئولية ناحيته، وإدبنى قوة وحكمة إنى أقوله وافرحه بمحبتك. فعلا خسارة نفس واحدة تتحرم من أبوتك ومحبتك بعد كل تعبك وفدائك العظيم يارب يسوع.

قال: سرحت في إيه يا ابنى!!

قلت. كلام جديد وخطير يا ابونا!! صلى لى علشان أقدر أدركه وأفهمه كويس!! كدا الادراك الأول هو إدراك عمل الله معنا. إيه هو الادراك الثانى؟!

قال: الادراك الثانى علشان نعمل مع الله هو

إدراك قيمة النفوس.

. فكل نفس لها قيمة عظيمة، كل نفس قيمتها تساوى دم المسيح، المسيح مات لأجل كل واحد، وكل شخص له قيمة خاصة ومتفردة في عينه، مكتوب في سفر اشعيا "لَا تَخَفْ لِأَنِّي فِدَّيْتُكَ. دَعَوْتُكَ بِاسْمِكَ. أَذْنَتِي لِي" (اش ٤٣ : ١). فكل واحد فينا معروف باسمه، كل واحد ليه قيمة خاصة، مافيش واحد يغنى عن الثانى، الله مش هايكتفى بمجموعة معينة ويقول "كفايا كدا، مش لازم باقى الناس تخلص!!". فالله عاوز كل واحد في خليقته يخلص ويكون في أحضانه. هأقول لك قصة يا ابنى. في قرية كان أب عنده سبعة ولاد، وفي يوم حصل حادثة لإثنين من ولاده وهم مسافرين وراكبين العربية بتاعتهم، وتوفى فيها ابن منهم في الحادثة، وفي القرية الناس كانوا بيعزوا الاب اللى كان حزين على ابنه. ويقول

-أه يا ابنى أه يا بيتر. ربنا ينيح روحك يا ابنى.

- ربنا يعزيك يا أبو مينا- ربنا يديك الصبر-الباقي في حياتك يا أبو مينا.

قال. لكن عمدة البلد كان راجل قاسى القلب، فلما لقيه حزين ويكي على ابنه قال له

"إيه يا أبو مينا زعلان قوى كدا ليه!! يعنى إيه اللى حصل، مات واحد فاضلك ستة، إيه هاتنهيب كفايا عليك ستة شباب!!"

فقال له الأب (بدموع):..نشكر ربنا على كل حاجة، لكن كل واحد له مكانة في قلبي!! دول عاملين

زى صوابع الإيد مافيش واحد يغنى عن التانى. يا عمدة!!"

قال: فهل الاب عنده حق إن يزعل على ابنه، ولا زى ما بيقول العمدة ما عنده ستة كفاية!!

قلت: طبعا مافيش أخ يغنى عن أخوه، العمدة دا راجل قاسى القلب وماعندهوش إحساس!!

قال: كل واحد في البشرية هو ابن لله، مافيش حد فينا يغنى عن التانى، كل واحد له بصمة مختلفة عن التانى، كل واحد فينا عنده DNA مختلف عن التانى، فهل حد يقدر يقول لأنه عنده ١٠ صوابع فمممكن يستغنى عن واحد منهم؟!

قلت: طبعا مش ممكن!!

قال: محتاجين نقدر قيمة كل واحد في البشرية، كل واحد له قيمة كبيرة قدام الله، فإحنا مش مجرد مخلوقات أو عبيد إحنا أبناء، وفيه فرق كبير بين كلمة عبيد وكلمة أبناء.

قلت: تقصد إيه يا أبونا؟

التقرب بنفس واحدة الى
الله بالتوبة أفضل عند
الله من جميع القرايين إذ
ليس فى العالم عند الله
أفضل من النفس
الإنسانية. لان كل ما فى
العالم يزول إلا النفس
المذكورة فإنها لا تزول.
(القديس يوحنا الدرجي)
الحب الأخوي ص ٢٣٤

قال: لو الواحد مجرد عبد ييقى ممكن ييقى ليه بديل، فهو هايكون مجرد عبد ييقوم بشغلانة، وأي عبد تانى يقدر يقوم بيها. لكن الابن ما حدش يقدر يغنى عنه، فمهما كان عدد الأبناء كبير، فما فيش حد يغنى عن التانى. فلو أدركنا إن كل إنسان هو ابن الله وغالى عليه، مش هانقدر نسكت ابدأً، وهانقدر قيمته ككنز ثمين، بيقول القديس يوحنا فم الذهب "هل لو وجدت وعاء مملوء ذهباً تقول فى نفسك لما لا يأخذ هذا الوعاء فلان او فلان؟! بل تبادر كالذئب الخاطف و تأخذه قبل أي إنسان!! ليكن لك هذا الاشتياق نحو أخواتك الساقطين، واضعاً نفسك وجدت كنزاً ثميناً جداً"^١

قال: فلو أدركنا قيمة كل واحد فى البشرية، وأد إيه هو مهم فى عين الله، وأد إيه هو ابن وقيمتة غالية جداً على قلب الله، مش هانسكت ابدأً، وهايكون عندنا طاقة ودافع كبير جداً، إننا نكرز ونتكلم عن أبوة الله وغفرانه، لكل الخليقة اللى فى كل العالم.

قلت: فعلاً محتاجين ندرك قيمة كل نفس وإن الواحد مش مجرد مخلوق أو عبد لكن ابن. لكن إيه الادراك التالت علشان نقدر عمل مع الله يا أبونا؟!

قال: تالت إدراك علشان نقدر نعمل مع الله، هو

إدراك مسئوليتنا وإمكانياتنا

^١ كتاب الحب الأخوي للقمص تادرس يعقوب ملطي ص ٢٣٨.

فإحنا مسئولين قدام الله إنا نوصل رسالته للعالم كله، مسئولين إنا نوصل غفرانه وحبه وأبديته لكل الشعوب وكل الأمم، فدى وصية الرب يسوع الأخيرة لينا، إنا نشهد عنه ونكرز بملكوته، ودى مسئولية مش إختيار، بيقول بولس الرسول^١ "إِنْ كُنْتُ أَبْشُرُ فَلَيْسَ لِي فَخْرٌ إِذِ الضُّرُورَةُ مَضُوعَةٌ عَلَيَّ فَوَيْلٌ لِي إِنْ كُنْتُ لَا أَبْشُرُ. فَإِنَّهُ إِنْ كُنْتُ أَفْعَلُ هَذَا طَوْعاً فَلَيْ أَجْرٌ وَلَكِنْ إِنْ كَانَ كُفْهًا فَقَدْ اسْتَوْفَيْتُ عَلَيَّ وَكَالَةً" (١ كو ٩: ١٦)

قلت: معناها إيه الآية دى يا أبونا!!

قال: بولس الرسول بيقول ضرورى إني أبشر، ولو كنت بأعمل دا بفرح الله هايباركنى ويدينى نعمة، لكن لو كنت بأعمل بـ^٢م وثقل، فالكراسة هاتكون مسئولية هاتحاسب عنها. فكل مسيحي هو مسئول إنه يشهد ويتكلم عن المسيح لأسرته، لأولاده، لأقربائه، لجيرانه، للعالم كله، كل واحد بحسب وزناته وبحسب إمكانياته. كان فيه أب جمع ولاده وقال لهم

النفس ثمينة جداً ولن يوازيتها العالم بأسره.
ورجع نفس واحدة
إلى طريق الحق
والصواب أفضل من
ربوات الأموال التى
تقدمها رحمة.
ق. يوحنا فم الذهب
الحب الأخوي ص ٢٣٨

"يا أولادى البحر محتاج سهر

وعلشان تعبروا بسلام وتقدروا توصلوا

للميناء ضرورى تبقوا سهرانين باستمرار، وتعرفوا الطريق الصح وتبعدوا عن جبال الجليد وتبعدوا عن الدوامات البحرية.

فسألوه ابن منهم. والطريق ازاي نعرفه!!
فقال له أبوه هايسيب لكم خريطة فيها الطريق المظبوط لو مشيتوا
عليها هاتوصلوا
قال: والأب بعد ما علم ولاده جه الوقت اللي هايسيبهم فيه فقال
لهم

"يا أولادى زى ما علمتكمم ازاي تعبروا البحر بسلام، علموا
ولادكم. وزى ما قتللكم على الطريق قولوا لهم، أوعى تسبيوهم لحسن
البحر خطر، واللى هايمشى فيه من غير معرفة هايهلك ويضيع، أنا
مستنيكم في الميناء، ارجوكم كل جيل يعلم الجيل اللي بعده إزاي
يعرف الطريق، دى وصيتى ليكم."

قال: لكن للأسف بعد سنين طويلة، فيه أجيال ماعلموش ولادهم،
واكتفوا إنهم بس يوصلوا للميناء، فالأجيال اللي بعدهم تعبت، وكل
ماتنزل البحر تنوه، لان ماحدش علمها الطريق، والقراصنة بتوع السفن
بعتوا جواسيس وقالوا لهم

"تحسبوا انكم هاتعرفوا توصولوا. البحر صعب. وهاتهلكوا
هاتهلكوا. هاتضيعوا هاتضيعوا، فعلى إيه تتعبوا نفسكم!! تعالوا عيشوا
معانا وافرحوا وانبسطوا وفي الآخر كل هاييموت!!

قال: وفعلا فيه ناس كتير منهم استسلموا لكلام الكذب، وفيه اللي
تاه وسط البحر وغرق، ودا كله علشان اللي عرف الطريق ماسلمش
الى بعده!! ولما كان حد يقولوا ليهم

”إخوتكم بتغرق!! ليه سايبنهم كدا، الناس هاتهلك!!
فيقولوا ” إحنا مش فاضيين!! اللي يهلك يهلك كفايا إحنا عرفنا
المسيح!!
ولما حد يصرخ لهم ويقول ”الناس مش عارفة الطريق محتاجة حد
يقولها حاجة!!

يقولوا ”المهم إحنا عرفنا المسيح وبنتناول ونروح الكنيسة، واللى
يضيع يضيع المهم إحنا عرفنا المسيح كفايا كدا”.
والناس بتصرخ وتقول ”إلحقونا إحنا بنهلك- محتاجين نعرف
المسيح- حد يكرز لينا ويلحقنا قبل ما نضيع- أتعذونا هانهلك”
لكنهم باستهتار يقولوا ”حد فاضى!!- كرازة مين!! كل واحد
يهتم بنفسه، الكرازة دى بتاع التلاميذ!! كرازة مين- إحنا ناكل
ونشرب ونموت- بلا كرازة بلا هم!!
قال: تقول إيه على الناس اللي اهملوا ولادهم وإخوتهم وسابوهم
يهلكوا؟!

قلت: أقل حاجة تتقال دى خيانة للامانة!!
قال. وإحنا برضه لو ما علمناش ولادنا وإخوتنا والناس اللي
حوالينا طريق المسيح، دى تبقى خيانة للامانة. خيانة لابونا
السماوى، اللي قال امضوا وتلمذوا جميع الأمم وعلموهم جميع ما
أوصيتكم بيه!!! فإزاي نقول إحنا مسيحيين ورايحين السما، وسايين
الناس حوالين محرومين من محبة المسيح!! إزاي نقول إحنا مسيحيين،

ومش بنطيع أبونا السماوى ولا ا حاسين بمشاعره ناحية البشرية اللى
بتهلك!! الله بيقول لينا

”يا أولادى. بكرر ليكم قدروا مشاعرى وحسوا بى، كل شخص
فى البشرية أنا فديته بدمى، كل شخص هو ابنى وأنا عاوز كل الناس
تخلص وتيجى ابديتى، عاوزكم تكونوا أمناء فى وصيتى ليكم، إنتوا
اللى عرفتوا محبتى عليكم مسئولية كبيرة، فكل اللى عرف محبتى
هو مسئول يوصلها لاختوته فى البشرية، ودا هو الدليل الحقيقى إنه
قبل محبتى ووثق فى ابديتى، إنه يتكلم عنها ويكرز بيها،
ماتخلوش هموم العالم تشغلکم عن رسالتكم السامية، ماتخلوش
خوفكم أو خجلكم يمنعكم إنكم تعلموا عن غفرانى وأبديتى. دى
مسئولية مش اختيار. مسئولية على كل اللى عرف محبتى ووثق فى
أبديتى إنه يتكلم وما يسكتش ابدًا“

فلو قدرنا مسئوليتنا، وإننا زى ما عرفنا طريق الخلاص، وقبلنا أبوة
الله وعرفنا غفرانه ووثقنا فى ملكوته، ضرورى إننا نعلم إختوتنا فى البشرية
وما نسيهمش يهلكوا، لو قدرنا المسئولية دى مش ممكن نسكت ابدًا!!
قلت.: بس إحنا ضعفاء يا أبونا. قدسك بتتكلم عن مستوى على
قوى، دا عاوز ناس زى الرسل والتلاميذ!!

قال: .فعلا الكلام اللى بنقوله محتاج عمل الروح القدس فينا، ودا سبب ضعفنا الأيام دى، إننا مش مدركين قوتنا، مش مدركين إن فينا الروح القدس اللى كان في التلاميذ، ومن غير الادراك دا مش هانقدر نعمل حاجة ونفضل مشلولين، والكراسة

لا أقدر أن اصدق
خلاص إنسان لا يعمل
من أجل خلاص أخيه.
ق. يوحنا فم الذهب
الحب الأخوي ص ٢٤٢

هاتبقى ثقل وهم كبير، فزى ما الله إدانا مسئولية الكراسة، إدانا الإمكانية اللى نقدر نقوم بيها بالكراسة. فالرب يسوع قال في
لَكُفْكُم سَتَ الْوَن قُوَّةً فَتَى حَلَّى الرُّوحِ
الْقُدْسِ عَلَيَّ كُمْ وَتَكُونُونَ لِي شُهَدَاءَ فِي
أَوْشَلِ يَمِ فِي كُلِّ الْيُودِيَّةِ وَالسَّامَةِ وَإِلَى أَقْصَى الْأَرْضِ" (اع ١ : ٨).

فمن غير قوة الروح القدس، ومن غير ثقتنا
الكاملة، إن اللى عمل في التلاميذ هاعمل
معانا، هانفضل في ضعف، ومهما أدركنا
مسئوليتنا لكن مش هانقدر نقوم بيها.

قلت: طيب ازاي الروح القدس يعمل فينا زى ما عمل في التلاميذ
زمان!؟

قال: علشان الروح القدس يعمل فينا زى الرسل، محتاجين
حاجتين، أول حاجة الإيمان، فمشكلتنا إننا مش مؤمنين إن الله
هاعمل فينا زى ما عمل في التلاميذ، وبكدا بنفضل في التعب والشعور

بالذنب، فبنقى حاسين إن واجب علينا إننا نتكلم ونكرز زى التلاميذ، لكن مش قادرين، لأن مش معانا قوة الروح القدس زى ما كان معاهم.

قلت: بس هم كانوا أقوياء يا أبونا. هم فين وإحنا فينا!!

قال: دى أفكار من إبليس علشان يحبطك يا ابني. فالتلاميذ كان عندهم خوف وليهم ضعفات زينا، لكنهم تدرجوا في الايمان خطوة خطوة، لحد ما بقوا أقوياء وغيرّ وا العالم كله، بيقول القديس يوحنا فم الذهب "لنعرف أن طبيعة بولس الرسول لم تختلف عن طبيعتنا بأي حال من الأحوال، ولكنه كان مثلنا، هذا يجعل ما يبدو صعبا ومستحيلا بالنسبة لنا، صار سهلا وخفيفا"

الغيرة من أجل خلاص
النفوس فى عيني الله
أفضل من صنع
المعجزات
ق يوحنا فم الذهب
الحب الأخوي ص ٢٣٥

قال: فالرسل كانوا بشر زينا، وكان ليهم نفس ضعفاتنا، لكنهم تدرجوا في النعمة، ووثقوا في عمل الله معهم وقوة الروح القدس فيهم، فغيرّ وا العالم كله. فمثلا مرقس الرسول اللى بشرنا في مصر، وغيرّ مصر من ظلمة الوثنية لنور المسيح، إنت عارف كتب عن نفسه إيه؟

قلت: كتب إيه يا أبونا؟

قال: كتب إن الرب يسوع لما راح لبستان جشيمانى بعد الفصح وجه اليهود يقبضوا عليه، فمرقس الرسول كان لسه شاب صغير فتبعه من بعيد، وكان لابس ازار على عريه، ولما قبضوا على الرب يسوع،

خاف مرقس الرسول وساب الرداء وهرب عريان، ولما بولس وبرنابا أخذوه معاهم في أول رحلة كرازية، خاف من البحر ورجع. ولما حب يروح مرة ثانية رفض بولس الرسول. ومرقس الرسول اللى خاف في بداية حياته، مع الوقت بقى عظيم في الخدمة، وكرز كرازة عظيمة، وخدم في أماكن كتير، وهو اللى كرز في مصر وغير بلادنا وحولها من عبادة الأوثان لمعرفة المسيح.

وزى ما إحنا شايفين العالم بيتجه ناحية الظلام من إباحية وإلحاد ومثلية، فالعالم محتاج لكرازة من جديد، والأمل في الشباب القبطي، الشباب القبطي لو دخلت فيه الروح الكرازية، هايغير العالم كله. واحد من الخدام قال

”وسط تيارات العالم الشريرة، الأمل في الشباب القبطي اللى لسه فيه روح الآباء، لو دخلت فيه روح الكرازة، هايغير العالم كله، وفي كل مكان هايروح فيه هايكون سبب بركة، وامتداد لملكوت الله في كل الشعوب، وزى ما اللى تشتتوا بسب الضيق اللى حصل بعد استشهاد استفانوس، كانوا يببشروا بالكلمة في كل مكان، زى كذا الاقباط اللى بيهاجروا في كل دول العالم، لما يكون فيهم روح الكرازة، هايكونوا سبب لنشر كلمة الانجيل في كل

مكان فى العالم، وتغيير لكل الشعوب، هم محتاجين بس

يبقى فيهم روح الكرازة"

. فأول حاجة علشان الروح القدس يعمل فينا، إننا نؤمن ان الروح

القدس اللى عمل فيهم يقدر يعمل فينا.

وتانى حاجة علشان الروح القدس يعمل فينا، ضرورى نكون

أمناء فى القليل.

قلت: يعنى إيه نكون أمناء فى القليل؟!

قال: يعنى مهما كانت إمكانياتنا قليلة ومواهنا ضعيفة، نبقى

واثقين إن الله يقدر يستخدمنا ويباركنا، لكن للأسف إحنا بنفرح بالكثير

وبس، ومش بنقدر القليل. ولأننا مش بنكون أمناء فى القليل، مش

بنأخذ الكثير. الرب يسوع قال فى "الْأَمِينُ فِي الْقَلْبِ يَلِ أَمِيرٌ ضَاٌ فِي

الْكَثِيرِ وَالظَّالِمُ فِي الْقَلْبِ يَلِ ظَالِمٌ أَيْضاً فِي الْكَثِيرِ" (لو ١٦ : ١٠).

فالأمين فى القليل، هايكون أمين لما يأخذ الكثير، لكن اللى معاه

حاجة قليلة ومش أمين عليها، فمش هياخذ أكثر، زى موظف صغير

لما يكون فاشل فى وظيفته، هل كدا ممكن يرتقى ويبقى المدير العام؟!

قلت: طبعاً لا. دا ممكن يتفصل من
الوظيفة اللى هو فيها أصلاً!!

قال: إحنا زى كدا، لو إحنا مش أمناء
فى القليل مش هاناخد الكثير، وكمان ممكن
يروح مننا القليل، لكن لما نكون أمناء فى
القليل، الله هاياركننا ويدينا الكثير. مرة
الرب يسوع كان بيعلم جموع كثير وبعد ما
خلّص تعليمه وحب يطعم الجموع تقدم
طفل مهاه خمس خبزات وسمكتين وقدمهم
للمسيح، فالطفل ما اتكشفش، الطفل ما
احتقرش القليل اللى معاه، الطفل ببساطة
قدم القليل للمسيح، فالمسيح بارك
واستخدم القليل اللى معاه، واشبع بيه جموع
كثير. فقدم اللى معاك ما تحتقروش، افرح

عبتا يحاول مخلوق ما
مهما حسب فى نفسه
من قوة الشخصية
واللياقة فى الحديث، أن
يحول شريراً عن
طريقه، فهذا من عمل
الخالق نفسه القادر على
تغيير الطبيعة البشرية
الساقطة، فخدمة العهد
الجديد هي خلق إنسان
جديد بالمعمودية،

وتجديد المعمودية
بالتوبة، وكلا العاملين
يطلبان تدخل الروح

القدس

ق يوحنا فم الذهب
الحب الأخوي ص
٢٥٦

بيه وقدمه بكل اهتمام، كما لو كنت هاتقدم اعظم شيء. ما تتكشفش
تقول كلمة، ما تجلسش تقدم نبذة، ما تستقلش تعمل "شير share"
لحاجة روحية، فالقليل اللى بين ايديك، الله يقدر يعمل بيه الكثير،
ويقدر يباركه ويغير بيه جموع كثير.

قلت: فعلاً مشكلتنا إننا مش مقدرين القليل اللى معانا ومستنيين
الكثير لما ييجى، وفى الغالب مش بيعجى ابدًا.

قال: محتاجين نكون أمناء ونقتر القليل، حتى لو كان كلمة واحدة أو نبذة صغيرة، فدى البداية، لو كنا أمناء فيها هانأخذ الاكثر، والله ييفرح مش باللى بنقدمه، لكن بالحب والإيمان اللى بنقدم بيه، فالمرأة الفقيرة مااحتقرتش الفلسين، لكن قدمتهم بفرح وحب. فمممكن يكون الشيطان قال لها " يعنى إيه فلسين!! هايعملوا إيه للهيكل!! فيه ناس بتقدم المئات والألوف!! فلسين إيه الحقارة دى مش مكسوفة من نفسك!!"

لكنها ما استسلمتش للأفكار الخبيثة دى وأكيد قالت له "هم فعلا حاجة بسيطة، لكن هأقدمهم، هأقدمهم والله هايقبلهم، هم دول كل اللى حيلتى، لو كان معاى أكثر كنت قدمته، وربنا لما يدينى أكثر هاقدم أكثر".

والرب يسوع مدح المرأة الفقيرة دى وقال "بالحق أقول لكم أن هذه الأرملة الفقيرة القتت أكثر من الجميع. لان هؤلاء من فضلتهم القوا في قرابين الله وأما هذه فمن إعوازاها ألفت كل المعيشة التي لها"
فلما نكون أمناء في القليل، الله هايدينا الكثير، ولما نقتر القليل ونقدمه بفرح واهتمام كأنه كنز عظيم، الله هاينظر لامانتنا ويدينا الاكثر، فكل خادام في مدارس الأحد محتاج يقتر قيمة الأولاد اللى بيخدمهم، وينظر لكل واحد وواحدة فيهم، كأنهم التلاميذ والرسل بتوع المستقبل، ويعامل كل واحد فيهم كأنه بولس الرسول، وكل واحدة كأنها القديسة

دميانة، فلما يكون جوانا الرجاء دا فيهم، هاتنقل لهم وهايكون جواهم
الرجاء دا في نفسهم.

قلت: ياريت الخدام يعملوا كدا بدل الكلام المحبط والتأنيب اللى
يجيب اليأس والاكتئاب!!

قال: واحد من خدام مدارس الاحد كان بيعمل حاجة جميلة جداً
في الفصل بتاعه، كان بيسمى كل طفل باسم من أسماء الرسل، فاللى
يدي له بطرس، واللى يأخذ مرقس، وكان بيعجب خريطة العالم ويقول
لهم "كل واحد يا ولاد يختار دولة ويصلى من أجلها، علشان تعرف
المسيح ويوصلها نور الانجيل، فالتلاميذ كل واحد فيهم راح دولة يكرز
فيها، يلا كل واحد يختار دولة".

فالاولاد كانوا بيفرحوا ويتفعלו معاه ويقولوا
-أنا بحب الصين يا أستاذ علشان فيها ناس كتير أنا هاأصلى من
اجل الصين.

-وأنا هاأختار كينيا علشان ابن عمى راح يشتغل دكتور اسنان
هناك ويحكى لى عنها كتير.

-وانا هاأختار الفلبين علشان سمعت إن هناك مش بيهتموا
بالبنات والبنات بتشتغل وهم صغيرين.

فكان يكمل ويقول لهم "وانتوا زى التلاميذ يا أولاد عليكم مسئولية
إنكم توصلوا الانجيل للعالم كله، فكل واحد يأخذ دولة ويصلى لها
كل يوم قبل ما ينام، طيب يلا نصلى دلوقتى يا أولاد وكل واحد

يصلى من أجل دولته ويقول يارب بارك في الدولة دى ، خليها تعرف محبتك وغفرانك ، ولما تكبروا ممكن تروحوا تشوفوا نتيجة صلواتكم ، وحتى لو ما رحتوش تشوفوها في السما ، فزى ما إحنا عارفين يا أولاد إن الصلاة لا تموت . الصلاة لا تموت"

فلما الأطفال من صغرهم يتربوا على كدا ، روح الكرازة هاتدخل فيهم ، ولما يكبروا هاييقوا كازين زى الرسل والتلاميذ .

فإحنا محتاجين روح الكرازة ترجع للأسر والبيوت ، محتاجين كل أسرة تأخذ دولة وتصلى لها كل يوم في المذبح العائلي .

وكمان لو روح الكرازة دخلت في الاديرة بتاعتنا هايحصل عمل عظيم واحد من الخدام قال

" الاديرة بتاعتنا مصدر قوة عظيمة ، ولو دخلت فيها روح الكرازة ، هاتكون سبب تغير وبركة للعالم كله ، فلو كل دير يتخصص في الصلاة من أجل دولة معينة ، ويكون فيه صلاة خاصة يوميا اسمها صلاة الكرازة ، وكمان لو ييجى شباب من الدول دى ، ويبقى فيها مدرسة للكراسة في كل دير ، يدرسوا ويتعلموا فيها وبعدين يرجعوا لبلادهم يكرزوا ويخدموا ، وبكدا هايكونوا سبب نور وبركة وتغيير لنفوس كتير . فزى الأديرة ما نجحت إنها تعمل مزارع ومصانع ، فبنعمة المسيح تقدر تنجح إن يكون فيها مدارس

للكراسة وتهتم بخلص الشعوب والأمم اللى لسه بعيدة عن

محبة المسيح ومعرفة الله"

قلت: مش ممكن حد يقول إن مهمة الأديرة هي الصلاة مش

الكراسة وإنها تكون بعيدة عن العالم؟!!

قال: سامحنى يا ابنى، اللى يقول كدا هو مش واقعى في كلامه،

فأنا مش بأقول الرهبان تنزل العالم، لكن بنقول شباب من دول محتاجة

كراسة، يتبناهم الدير ويتلمذهم على الكراسة، إننا محتاجين بشدة يبقى

فينا روح الكراسة!! محتاجين ندرك خلاص نفوسنا في الأول، علشان

يبقى فينا غيره على خلاص الآخرين. نراجع الكلام اللى قلناه النهاردة

لحسن ننسى، النهاردة اتكلمنا عن دوافع للعمل مع الله، كان اول دافع

هو

قلت: إدراك عمل الله معنا. يعنى إدراك أبوة الله وغفرانه المجانى

والأبدية السعيدة.

قال: والادراك التانى هو

قلت: الادراك التانى هو إدراك قيمة كل نفس، فكل نفس تساوى

دم المسيح وكل شخص هو ابن لله ومميز باسمه، وما فيش ابن يغنى عن

أخوه.

قال. والادراك الثالث هو

قلت: هو إدراك مسئوليتنا وإدراك إمكانياتنا.

قال: وقلنا محتاجين حاجتين علشان الروح القدس يعمل فينا زى التلاميذ، وكانوا هم

قلت: يكون عندنا إيمان إن الروح القدس اللى عمل فيهم هاعمل فينا، وتانى حاجة نكون أمناء في القليل. لكن إيه التدريب بتاع النهاردة يا أبونا.

قال: تدريب النهاردة حاجتين. اول حاجة إنك تراجع تدريب صلاة الامتلاء بالروح القدس، اللى هي وانت بتاكل تطلب وتقول "يارب إملئني بالروح القدس"

قلت. ياه لى فترة نسيته بنعمة ربنا هأبدا فيه من تانى. وإيه التدريب التانى يا أبونا؟

قال: إنك تفتكر تدريب المرة اللى فاتت إنك تبقى أمين في القليل، يعنى كل يوم توزع نبذة أو تنشر حاجة روحية. وتفتكر في المذبح العائلى مع أسرتك تختاروا دولة وتصلوا لها كل يوم مع بعض.

قلت: حاضر يا أبونا. صلواتك. سلام يا أبونا

قال: صلواتك امنا العدراء وكل القديسين. ربنا معاك يا ابني

للحصول على باقى السلسلة:

من تطبيق الأندرويد "مبادئ الحياة الروحية".

Website: mbade2.com

facebook.com/mbad2

أو لسماع الحلقات بشكل درامى

<https://soundcloud.com/mbade2>



**لنا رجاء أن تتم ترجمة هذه السلسلة وتنشر بلغات مختلفة وتوزع فى كنائس المهجر والبلاد السياحية. وبنعمة المسيح قد بدأنا فى الترجمة (للإنجليزية والألمانية والفرنسية والإيطالية والاسبانى والأمهرية والصينية والاندونيسى والاريترى والاورمو واليابانى والفلبينى) ونرحب بمن يساعدنا فى هذا العمل لمجد المسيح.



**نرحب بأى كنيسة أو خدمة تساعدنا فى الطباعة أو تطبع أى أجزاء من السلسلة بشرط أن تكون مجاناً أو بنفس السعر المدعم. (للتواصل ٠١٢٨٥٦٢٥٣١٤)

أو godlovehoste@gmail.com

سعر النسخة ٢٥ قرش

(غير مسموح بالبيع بأكثر من خمسة وعشرون قرشاً).
توجد كميات مجانية لكنائس القرى والأسر الجامعية.